

# La Terra Grischuna preschenta il Scanvetg

Bel purtret da la Val tranter Cuira ed Arosa

■ (anr/gc) **La novissima ediziun da la Terra Grischuna (I/2011) dat in sguard sin insaquants aspects dal Scanvetg – la vallada ch’entschaiva a Cuira e tanscha fin si sur Arosa, ch’è bain ses pli enconuschent lieu.** La via chantunala si d’Arosa – che veva ina giada 365 curvas – è vegnida averta fin là 1890. Fitg enconuschent e prest ina ensaina caratteristica per la regiun è dentant il viaduct da Langwies da la Viafier Cuira–Arosa sur la Ples-sur. L’aua da quest flum vegn utilisada da trais producents d’energia. Ils blers vitgs dal Scanvetg sa chattan dretg dal flum – saniester davanttiers èn be Tschierschen e Praden. En quella Val, era ritga da mitus e ditgas, datti bler d’admirar. Fin il temp medieval eran Rumantschs qua da chasa. Nà da Tavau èn ils Gualsers vegnids en il 14. tschientaner.

En il Scanvetg pon ins far tuttas activitads da sport d’enviern. Da gronda muntada sco start persuenier è l’Obersee ad Arosa. Ina giada eran il lai e ses conturn idillic in center per curtas spassegiadas. Uss è el da muntada per plirs eveniments sportivs e culturals. – Avant 80 onns è era l’architettura moderna vegnida ad Arosa cun insaquants bajetgs. Da gronda muntada per Arosa è vinavant il turissem da congress. Ina giada era quest vitg in lieu per vacanzas da famiglias, lu patria dal renumà trio da giugaders da hockey (*Hans Martin Trepp, Ueli e Gebi*

*Poltera*). Uss èsi il Festival d’umor che atira blera gliעד.

Interessant è – surlonder vegn medemamain rapportà – l’inscunter cun *Ruth Licht*, in’enconuschenta fotografa, che tgira dapi onns cun grond quità il museum local, nua ch’i dat da guardar blers stgazis da la Val. Arosa è era daventà in mecca per musicists che vulan sa perfeziunar. Dapi 25 onns datti là emnas da curs. Entschavì han ins cun 25 participants ed uss èsi 1200 ad onn.

Relatà bain en text e maletg vegn da la surdada dal Premi Terra Grischuna 2010. Quel è i – e la purtadra è stada tut perplexa – a *Marianne Fischbacher*. La laudatio ha *Christian Joos* salvà. Renconuschids èn vegnids – cun tutta raschun – ils gronds merits da Marianne Fischbacher per mantegnair objects da ritga cultura en Surselva. Ensemen cun Alfons Maissen ha ella realisà il Museum Regiunal Surselva a Glion. Chapavel ch’ella ha gì plaschair e nus pudain era cuir da cor ad ella quella distincziun per ses engaschi cultural en tutta calma.

La Terra Grischuna renda er attent ad ina bella excursiun cun skis sin il Wissgrätli sper Zervreila/Val S. Pieder, al viadi da lecturs sin ils fastizs (chastels) dal retg Ludovic II on Baviera, preschenta l’Argo a Cuira e mussa plinavant tge bel art che dunna Holla po tut far cun la naiv. Facit: Era la natira ha cultura.